

**Uunga siunnersuut: Nalunaaquttap aalajangersarneqarnera pillugu Inatsisartut
inatsisaat.**

Naalakkersuisut Siulittaasuannit saqqummiunneqartoq

pillugu

Inatsisinut Ataatsimiititaliap

siunnersuutip aappassaaneerneqarneranut

ISUMALIUTISSISSIONAA

Ataatsimiititaliap ulloq 2. november suliariinninnermini ilaasortarai:

Inatsisartunut ilaasortaq Anders Olsen, Siumut, siulittaasoq
Inatsisartunut ilaasortaq Aqqalu Jerimiassen, Atassut, siulittaasup tullia
Inatsisartunut ilaasortaq Mala Høy Kúko, Siumut
Inatsisartunut ilaasortaq Harald Bianco, Inuit Ataqatigiit
Inatsisartunut ilaasortaq Asii Chemnitz Narup, Inuit Ataqatigiit

UKA2022-mi ulloq 6. oktober 2022 siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Matumani siunnersuummi suliassaqarfiup "Nalunaaquttap aalajangersarneqarnera" tiguniarneranut naammassiniarneq kiisalu tassunga ilassutitut Kalaallit Nunaannut nalunaaquttap ingiaqatigiiffia nalinginnaasoq UTC -3-miit UTC 2-mut allanngortinnejarnissaanut aalajangiinissaq siunertaavoq. Tamassumap kingunerissavaa, Kalaallit Nunaata Europallu tiiminik nikingassutaat nalunaaquttap akunneranik ataatsimik ilanngassasut, Amerika Avannarlermullu tiimit nikingassutaasut nalunaaquttap akunneranik ataatsimik ilaneqarlutik. Siunnersuut aasaanerani nalunaaquttap aalajangersarneqarnera Kalaallit Nunaanniluunniit piffinni Ittoqqortoormiini, Danmarkshavnimi Pituffimilu ullumikkut nalunaaquttap ingiaqatigiiffianik nalinginnaasumik malitaqanngitsunut allannguissanngilaq.

2. Siunnersummik Inatsisartut siullermeerinninnerat

Siunnersuutip siullermeerneqarnerani aasaanerani nalunaaquttap atorunnaarsinnissaa aamma piffiit nalunaaquttap ingiaqatigiiffianut nalinginnaasumut malinnaanngitsut immikkut sammineqarput. Aasaanerani nalunaaquttamut tunngatillugu EU-mi nunani aasaanerani ukiuuneranilu nalunaaquttap nikisittarunnaarnissaanut suliap naammassineqarnissaa

utaqqineqassanersoq namminerluunniit suliaq aallartissanerlutigu oqallinnerup immikkut sammivigaa. 2019-imi Upernaakkut Ataatsimiinnermi siunnersuutip (immikkoortoq 55) aasaanerani nalunaaquattamut tunngasup akuerineqarsimanera ilaasortanit arlalinnit eqqaaneqarpoq, 2016-imilu Ukiakkut Ataatsimiinnermit siunnersuut assingusoq (immikkoortoq 88) itigartinneqarsimasoq.

Piffit nalunaaquattamik ingiaqatigiiffimmik nalinginnaasumik malitaqanngitsut pillugit oqallinnermi Ittoqqortoormiit inissisimaffia immikkuullarissoq aammalu nalunaaquataq ingiaqatigiiffiusoq nunap sinnerata malitaanut Ittoqqortoormiit inissinneqassanersoq oqallinnermi immikkut sammineqarpoq. Uanilu aamma Qaanaaq assinganik immikkut nalunaaquattamut ingiaqatigiiffimi allami inissisimanersoq tassungalu allannguiteqartoqassagaluarnersoq eqqartorneqarluni.

3. Tusarniaanermi akissutit

Tusarniaanermi akissutit inatsisissatut siunnersuummut kakkiunneqarput, tamannalu Inatsisartut Siulittaasoqarfianniit ilusissatut piumasaqaatinut naapertuulluni.

Ataatsimiitaliap paasivaa, tusarniaanermut akissutit tamarmik siunnersuut ilassilluaraat taamatuttaarlu aningasatigut pitsaaqutissaanik arlalinnik taakkartuisut. Aammattaaq Ittoqqortoormiini nalunaaquattap ingiaqatigiiffiata malinneqartup allanngortinneqarnissaanut tunngatillugu siunnersuutip imarisaani saqqummiussisummilu imminnut naapertuutinngitsunik allassimasoqarnera ataatsimiitaliap paasivaa. Tamanna immikkoortoq 5.1-imi sukumiinerusumik iserfigineqassaaq.

4. Apeqqutit

Ataatsimiitaliap siunnersummik suliaqarnerminut atugassaminik apeqquutinut arlaqartunut Naalakkersuisut Siulittaasuannut akissuteqaaqqusippu. Ataatsimiitaliap apeqquutigisimasai aamma Naalakkersuisut Siulittaasuata akissutai matumani isumaliutissiisummi ilanngussatut kakkiunneqarput.

Siunnersuutip siullermeerneqarnerani oqallisigineqartut pissutsit assigiinngisitaartut arlallit ataatsimiitaliap apeqquuteqaatimini qulaajarniarsimavai. Aasaanerani nalunaaquattamut nalunaaquattallu ingiaqatigiiffiinut assigiinngitsunut nalunaaquattap ingiaqatigiiffianik allannguinerup innuttaasunut inuussutissarsiornermullu qanoq sunniuteqarsinnaaneranut apeqquut tunngapput. Naalakkersuisut akissutaasa ilaat toqqakkat ataatsimiitaliap ataani sammivai.

5. Ataatsimiitaliap siunnersummik suliariinninna

Matumani siunnersummi suliassaqarfiup "Nalunaaquattap aalajangersarneqarnera"-nik tigusinissaq peqatigitillugulu Kalaallit Nunaannut nalunaaquataq ingiaqatigiiffiusup

malinneqartup allanngortinnejarnissaanut aalajangersaanissaq anguniarneqarpoq. Kalaallit Nunaanni nalunaaquattap inissinneqarneranut aasaaneranilu nalunaaquattamik aaqqissuussisarnerup atorunnaarsinnissaanut tunngasut siornatigut Inatsisartuni eqqartorneqareernikuupput, kingullermik 2019-imi. Immikkoortoq 5.2-mi pissutsit aasaanerani nalunaaquattamut tunngasut ataatsimiititaliap sukumiinerusumik iserfigissavai.

Nalunaaquattap ingiaqatigiiffia Danmarkshavnimut Pituffimmullu atuuttut matumani siunnersuutikkut allannguuteqarfingeqartussaanngitsut Naalakkersuisut ataatsimiititaliamut akissuteqaatiminni ilisimatitsissutigaat. Taamatuttaaq Kalaallit Nunaanni nalunaaquataq ingiaqatigiiffik nalinginnaasoq Qaanaami malinneqartoq taamatullu nalunaaquattap ingiaqatigiiffia Pituffimmi atuuttoq Qaanaamit malinneqanngitsoq ilisimatitsissutigineqarpoq.

5.1. Ittoqqortoormiini nalunaaquattap ingiaqatigiiffiatut immikkoortutut

Ittoqqortoormiinut nalunaaquattap ingiaqatigiiffia malinneqartup allanngortinissaanut isumaliuteqartoqanngitsoq Naalakkersuisut inatsisissatut siunnersuummut nassuaatini ilisimatitsissutigaat. Oqariartuutilli akerlerisaanik Naalakkersuisut siullermeerinninnermi saqqummiussisummi nunap sinnerani nalunaaquattap ingiaqatigiiffia malinneqartoq Ittoqqortoormiini aamma atuutilissanersoq eqqarsaatersuutigineqarsimasoq allassimavaat. Taamatuttaaq Naalakkersuisut tamassumap Inatsisartullu oqallisiginissaanut qilanaarnerarput. Apeqqut nalunaaquattap ingiaqatigiiffianut tunngasoq tassarpiaavoq sammisaq siunnersuutip siullermeerneqarnerani tikinneqartut ilaat.

Naalakkersuisut tusarniaanermi Ittoqqortoormiinut nalunaaquattap ingiaqatigiiffiusup allanngortinissaanut pilersaannginnerariarlutik kingorna apeqqut oqallisigisassatut qaquinneqarnera ataatsimiititaliap ajuusaarnartutut isigaa. Ataatsimiititaliaq isumaqarpoq tusarniaanermut taamatut periuseqarnerup akissutigineqarsinnaasut tamakkinngitsoornerannik kinguneqartitsisinnaasoq. Kingunerisimassavaa, pineqartut sunnerneqarsinnaasut soorlu Ittoqqortoormiini innuttaasut, Kommuneqarfik Sermersooq aamma Air Greenland tassunga tunngasumik apeqqummik saqqummiussiffigineqarsimasuugunik Ittoqqortoormiini nalunaaquattap ingiaqatigiiffiata nutaap qanoq sunniuteqarsinnaaneranik qulaajaanermut ilassutissaqarsinnaasimassagaluartut. Tamanna tunnavigalugu tusarniaanermut piffissaq killerititaq qaangiutereersoq imarisaata allannguuteqarfingineratigut kingunissanik Naalakkersuisut namminneerlutik qulaajaaniarnissaat ataatsimiititaliap kaammattuutigissavaa. Taamatuttaaq aalajangersimasumik Ittoqqortoormiini nalunaaquattap ingiaqatigiiffiata allanngortinnerata kingunissaanik Naalakkersuisut qulaajaanissaat ataatsimiititaliap kaammattuutigissavaa.

Ittoqqortoormiini nalunaaquattap ingiaqatigiiffiata malinneqartup allaanerusup allanngortinnejarnissaanut kingunissaasa maanna ilisimaneqannginnerat ataatsimiititaliap inerniliuttariaqarpaa.

5.2. Aasaanerani nalunaaqutaq

Aasaanerani nalunaaquttamik aaqqissuussisarnerup atorunnaarnissaa kingullermik 2019-imi Upernaakkut ataatsimiinnermi oqaluuserineqarpoq. Tassani aasaanerani nalunaaquttamik aaqqissuussisarnerup atorunnaarnissaanut Naalakkersuisut suliniuteqarnissaannik Inatsisartut tamarmiullutik peqqusinissartik akuersissutigaat. Tassani EU-mi aasaanerani nalunaaquttamik aaqqissuussisarnerup atorunnaarnissaanut eqqartuisoqarneranut atatillugu Naalakkersuisut aasaanerani nalunaaquttamik aaqqissuussisarnerup atorunnaarnearneqarnissaa pisusissamisoortutut isigisimavaat. Piffissami tassani EU-mi nunat aasaanerani nalunaaquttamik aaqqissuussisarnerup atorunnaarnissaanut suliaqarnermik aallartitsisimapput, tamannalu suli naammassineqarani. Taassuminnga suliaqarnerup qaqgu naammassineqarnissaa oqaatigineqarsinnaanngitsoq Naalakkersuisut ataatsimiititaliamut paasissutissiissutigaat.

Tassunga atatillugu EU-p aasaanerani nalunaaqutaqartillugu Kalaallit Nunaata allannguinngikkallarnissaa Naalakkersuisut pisusissamisoornerpaatut isigaat. Tamanna siunnersuummut atatillugu isumaqarpoq, aasaanerani nalunaaquttamik aaqqissuussisarnerup atorneqarneranut allannguiteqartoqarnavianngitsoq. Taamaalilluni ataatsimiititaliaq isumaqarpoq, EU-mi tassunga aalajangiisoqareeriarpat aatsaat aasaanerani nalunaaquttamik aaqqissuussisarnerup atorunnaarnera pisinnaasoq.

Tamassumap saniatigut Savalimmiuni massakkut nalunaaquttap nalinginnaasup atorunnaarnissaanut siunnersuut, taamaalilluni Savalimmiuni aasaanerani nalunaaqutaq atortuaannalerlugu, imaappoq UTC +1-imiittuaannalersitsisussaq tusarniaassutigineqartoq Naalakkersuisut akissuteqaatiminni ilisimatitsissutigaat. Taamatuttaaq Islandimi aasaanerani nalunaaquttap atorneqannginnera Naalakkersuisut ilisimatitsissutigaat. Aasaanerani nalunaaquttamut aaqqissuussisarneq atornagu inuuneq aasaaneranilu nalunaaquttamut aaqqissuussisarnermut allannguiteqarnermi suliaqarneq pillugit Savalimmiut Islandillu misilittagaannik Naalakkersuisut aallerfeqarnissaannik ataatsimiititaliaq Naalakkersuisunut kaammattuuteqassaaq.

5.3. Peqqissutsimut kingunerisassat

Siunnersuutip siullermeerneqarnerata nalaani Inatsisartunut ilaasortat akornannit nalunaaquttap ingiaqatigiiffiusup allanngortinnissaanut aasaaneranilu nalunaaquttamik aaqqissuussisarnermik atorunnaarsitsisoqassagaluarpat nunami innuttaasunut peqqissutsimut kingunerisassai pingartumik sammineqarput.

Tusarniaanermut akissuteqartuniit innuttaasunut peqqissutsimut sunniuteqarsinnaaneranut tunngasunik tikkuussisoqarsimanginnera Naalakkersuisut ataatsimiititaliamut ilisimatitsissutigaat. Taamatuttaaq nalunaaquttap ingiaqatigiiffiusup allanngortinneranut

atatillugu innuttaasut peqqissusaannut siunnersuutip qanoq sunniuteqarsinnaaneranik misissuinermik Naalakkersuisut immikkut ittumik suliaqarsimannngillat. Siunnersuutip inuit peqqissusaannut sunniuteqassangatinneqanngitsutut naatsorsuutigineqarnera Naalakkersuisut nassuaatini ilisimatitsissutigaat.

Siunnersuutip inuit peqqissusaannut sunniuteqassangatinneqannginneranut Naalakkersuisut naatsorsuuteqarnerat nalornissuteqarnermut aamma pineqartup ilisimanngisat killinganiinneranut attuumassuteqarsinnaaneranik ataatsimiititaliaq isumaqarpoq.

6. Siunnersuutip aningaasatigut kingunerisassai


Siunnersuutip piviusunngortinneqarnerata aningaasatigut kingunerisassai siunnersummut nalinginnaasumik nassuaatini allaaserineqarput. Pisortanut, inuussutissarsiornermut innuttaasunulluunniit siunnersummut atatillugu allaffisornermut aningasaqarnermulluunniit siunnersuut ajortumik kinguneqassanngitsoq oqaatigineqarpoq. Air Greenland tusarniaanermut akissuteqaammini siunnersuutip kingunerisassaanik pitsaasunik arlalinnik ilisimatitsivoq. Taakkua inatsisisstatut siunnersummut nassuaatini ilanngussaq 2-mi takuneqarsinnaapput, tassanilu ilaagitugt kinguaattoqartillugu timmisartumi aquttut eqqisisimaarsinnaanerannut qanoq pitsaasumik sunniuteqarsinnaanersoq takuneqarsinnaalluni.

7. Ataatsimiititaliap inassuteqaatai

Sinerissap qanittuani aalisarnermut attuumassuteqartut ilaat siunnersummut tusarniaaffigineqarsimannnginneri ataatsimiititaliamit paasineqarpoq. Tamanna tunngavigalugu sinerissap qanittuani aalisarnermut attuumassuteqartunik Naalakkersuisut oqaloqateqarniarnissamut aallartitsinissaat ataatsimiititaliap kaammattutigissavaa, qulaajaanissaq aammalu pitsaannngitsunik kinguneqassappat aaqqiissutissaasinnaasunik ujartuinissaq siunertalaralugu. Assersuutigalugu tunisinermut periarfissat ullormullu silap qaamasarnerata ataqtiginnerat oqaloqatigiinnermit qulaajarneqarsinnaassagaluarpoq.

Taama oqaaseqarluni ataatsimiititaliap isumaqatigiittup siunnersuutip akuersissutigineqarnissaa inassutigaa.

Taama oqaaseqarluni isumaliutissiisummilu allassimasunik paasinnilluni ataatsimiititaliap siunnersuut aappassaaniigassanngortippaa.



Anders Olsen
Siulittaasoq



Aqqalu Jerimiassen
Siulittaasup tullia

Harald Bianco



Asii Chemnitz Narup



Mala Høy Kúko
mala simer